



**FA'AMATALAGA  
TAU ALAMANUIA**

**2022 - 2025**

 26949/29916

 [info@utos.ws](mailto:info@utos.ws)

 [www.utos.ws](http://www.utos.ws)

## AI'A'IGA E LĒ NOATIA AI

O lenei Faamatalaga Tau Alamanuia i le Aso 1 Iulai 2022, ua tusia lea ma le faamoemoe e faamalamalamaina le auala e faatau ai iunite mai le tatou Faaputugatupe Teufaafaigaluega o Mavaega Tausi a Samoa (“UTOS” po’o le “Faaputugatupe”). Ia manino ma ia malamalama tagata uma, i tulaga eseese e ono lamatia ai a latou teugatupe e aofia ai le leai ai o se tupe fa’aopoopo, pe laititi ifo foi se seleni e toe maua atu peā faatusatusa i le aofaiga na faavae ai le teugatupe. E lē faamaonia e le Tausi Mavaega (Tafailagi Trustee Company) poo le Kamupani o Pulega (Unit Trust of Samoa [Management] Limited), ona toe totogina atu se vaega tupe ua toesea mai le tupe faavae sa totogina mai (lau seleni teugatupe faafaigaluega). Ia manino ma malamalama foi, e galulue faatasi le “Kamupani o Pulega” ma le “Tausi Mavaega”, i faaiuga uma e aafia ai tupe o loo teufaafaigaluega e le Faaputugatupe o Mavaega Tausi, ma e faia ma le faaetete ina ia mautinoa le saogalemu o teugatupe mai tulaga e ono lamatia ai.

E ao i tagata uma o loo teuina faafaigaluega a latou seleni ona faitau ma le toto’a lenei Faamatalaga Tau Alamanuia, ma ia faia foi se latou lava ia suesuega faapitoa e auiliili ai pe talafeagai ma manuia le teuina o latou seleni e teufaafaigaluega i le UTOS. E aogā foi ona saili se fesoasoani tau tomai faapitoa i tulaga tau seleni e teufaafaigaluega ae le’i faamautuina se faaiuga e teu faafaigaluega se seleni i le UTOS.

O lenei Faamatalaga o Alamanuia, e lē faavaeina sana ofo mo soo se tasi i soo se tafa pulega e le tatau iai, ona o aiaiga faaletulafono, aemaise latou e le faatagaina i lalo o le tulafono ona faia se fefaatauaiga, ma ua na o le UTOS e fitoitonu iai lenei ofo.

Ia manino ma malamalama, e lē noanoatia le UTOS, le Komiti Faatonu, le Tausi Mavaega, tagata faigaluega faapea ma soo se tagata lava o loo umia iunite pe leai foi, i soo se noataga e faasino i ai’a’iga ua tusia i lenei lomiga e faatatau i teugatupe teufaafaigaluega. O lenei Faamatalaga Tau Alamanuia, e le’i tusia ina ia avea ma fautuaga faatulafono pe fautuaga faatomai faapitoa. O le fautuaga, ina ia sailia muamua se fesoasoani faaopopo mai seisi o loo iai le tomai faapitoa i teugatupe faafaigaluega, e avea ma faufautua.

E faamaonia e le Tausi Mavaega faamatalaga uma ua tusia i lenei Faamatalaga Tau Alamanuia, ua faia lea ma le faamaoni, e aunoa ma ni faamatalaga sese pe taufaasese foi.

O lenei Faamatalaga Tau Alamanuia, ua faaliliuina mai lona lomiga faa-Peretania. A iai ni feteenaiga poo se tulaga ua lē manino i le faitau, ia faaaogaina faamatalaga i le lomiga faa-Peretania (UTOS Prospectus 2022) e faamanino atili ai.

O lenei Faamatalaga Tau Alamanuia o le Aso 1 Iulai 2022 ua tuuina atu e tusa ma le Fuaiupu 8 o le Tulafono o le Faaputugatupe Teufaafaigaluega o Mavaega Tausi 2008 ma ua suia ai le Tusi o Faamatalaga o Alamanuia o le Aso 1 Iulai 2018.

## Lisi o Matāupu

E UIGA I LE UTOS.....	1
KAMUPANI O PULEGA.....	1
O LE TAUSI MAVAEGA.....	2
E FAAPEFEA LONA FAAGALUEAINA .....	2
ITU E LELEI AI LE TEUFAAFAIGALUEGAINA O TUPE I LE UTOS .....	4
TULAGA LAMATIA O LE TEUFAAFAIGALUEGAINA O TUPE I LE UTOS .....	6
AISEA E TEUFAAFAIGALUEGAINA AI TUPE? .....	8
KAMUPANI O PULEGA.....	8
LE TAUSI MAVAEGA .....	9
SUETUSI O LE FAAPUTUGATUPE.....	10
LE PULE FAATONU.....	11
TAU, TOTOGIFUAPAUINA MA TAU FAAEE ATU .....	11
TAU O LE IUNITE.....	13
PEPA FAAMAONIA O FEAGAIGA .....	15
AIAIGA MO LE TUUINA ATU O FAAMAUMAUGA O LE AUFIIUNITE .....	15
FAAMAVAE, AVEESEA MA LE SUIA O LE PULE .....	16
FAAMAVAE, AVEESEA MA LE SUIA O LE TAUSI MAVAEGA.....	16
AUFIIUNITE .....	17
O NOATAGA I LE AVEA AI O OE MA SE SUI-FAIIUNITE.....	17
FONOTAGA A AUFIIUNITE .....	18
TOE FAATAUINA MAI O IUNITE.....	19
FESIITAIGA O IUNITE .....	19
TUFATUFAGA O TUPE FAASILI I LE AUFIIUNITE .....	20
LIPOTI FAALETAUSAGA .....	20
TAPUNIA O LE RESITALA .....	21
FAAMAPEINA MA LE FAAMUTAINA O LE MAVAEGA TAUSI.....	21
POLOKALAME MO LE RESITALAINA O IUNITE.....	21
FAAMATALAGA MO LE FAATUMUINA O LE PEPA TALOSAGA MO LE FAATAUINA O IUNITE .....	22
MAVAEGA A LE SUI FAIIUNITE .....	24
O FESILI MASANI .....	24

FAAMATALAGA TAU TUPE ..... 27  
FESOOTAIGA MA LE OFISA..... 30

## **E UIGA I LE UTOS**

O le Faaputugatupe Teufaafaigaluega o Mavaega Tausi a Samoa (le “UTOS” poo le “Faaputugatupe”) o se fuafuaga a le Malo o Samoa (le “Mālō”). O lona sini o le tuuina atu lea “o se auala ma le avanoa tutusa mo soo se tagata nuu a Samoa e teu fa’afaigaluega ai seleni”. Ua tuuina atu foi e le UTOS se avanoa i le aufaipisinisi a Samoa ma tagata nuu a Samoa o lo o afifio ma papaa’ao i atunuu i fafo, e teufaafaigaluega ai a latou tupe.

O le Minisita o Tupe sa faamaonia le faavaeina o le UTOS i le Aso 2 Mati 2009 e pei ona manaomia e le fuaiupu 3 o le Tulafono o Faaputugatupe Teufaafaigaluega o Mavaega Tausi 2008. O le faaputugatupe a le UTOS na amata lana auaunaga i le Aso 9 o Iulai 2010. O le sootaga i le va o le Pule ma le Tausi Mavaega ua faatulagaina i le Pepa Faamaonia o Feagaiga o Mavaega Tausi (o le “Feagaiga”), o le Aso 9 Iulai 2010 a le UTOS faapea ma le Tulafono mo Faaputugatupe Teufaafaigaluega o Mavaega Tausi 2008. E ao i le UTOS ona limataitaina galuega fai i taimi uma e tusa ai ma le Pepa Faamaonia o Feagaiga o Mavaega Tausi.

Ua tuuina atu e le UTOS se avanoa mo so’o se tagata Samoa e teufaafaigaluega latou seleni i vaega eseese o tupe teufaafaigaluega, ae i lea lava taimi, o lo’o faaititia ai tulaga lamatia ma taatia ai le puleaina o latou tupe teu faasaoina i aao o tagata ua iai le poto masani i le teufaafaigaluegaina o tupe.

## **KAMUPANI O PULEGA**

E tusa ai ma le tulafono o lo’o faavaeina ai le UTOS, e tatau ona iai se Kamupani o Pulega e fa’afoeina galuega fai a le Faaputugatupe. O lea matāfaioi ua gāfa lea ma le Kamupani o Pulega a le Fa’aputugātupe Teufa’afaigaluega o Mavaega Tausi (“Kamupani o Pulega”) ma e iai fo’i lana Komiti o Fa’atonu. O le matāfaioi o le Kamupani o Pulega o le filifilia lea o auala eseese e faafaigaluega ai seleni a le Fa’aputugātupe faatasi ai ma faaiuga fai; ae e tatau ona o gatasi nei faaiuga e tusa ma ai’a’iga o Taiala o Pulega Fa’atonu, tulafono ma faiga fa’avae. O le Kamupani o Pulega o lo’o galulue ai se aufaigaluega ua lava le tomai ma le silafia i galuega tau tupe teufaafaigaluega auā ni faaiuga lelei mo le manuia o le aufaiiunite.

## **O LE TAUSI MAVAEGA**

O le Tausi Mavaega o ia lea o lo’o vaaia ma le tōtō’a galuega a le Kamupani o Pulega. O le Tausi Mavaega o loo iai nei- o le Tafailagi Trustee Company Limited (“Tausi Mavaega”). O le matāfaioi a le Tausi Mavaega o le puipuia lea o aiā tatau a le suifaiiunite ma i lalo le Tulafono Faavae, o meatotino ma teugatupe o teufaafaigaluega a le Fa’aputugātupe e resitalaina lea e le Tausi Maveaga.

## **E FAAPEFEA LONA FAAGALUEAINA**

E faatauina mai e tagata iunite mai le UTOS ma avea ai ma o ia o se “sui-faiiunite”. E mafai ona e faatauina mai iunite e le lalo ifo mai le 25 le aofaiga. E tatau oa e umia pea le 25 iunite i soo se taimi ina ia faa’auau ai pea ona avea oe ma se sui-faiiunite. E tuuina atu i le suifaiiunite se tusi faamaonia e faailoa ai le aofaiga o iunite o loo latou umia.

O le aufaiiunite ua nao tagata nuu o Samoa, i latou o loo umia sitiseni poo pepa nofo mau i Samoa. E mafai ona avea tagata taitoatasi, aiga, pisinisi poo se faalapotopotoga ma suifaiiunite. O sui faiiunite fou uma e tatau ona faatumu muamua pepa talosaga ma tauaao mai pepa faamaonia ma isi pepa talafeagai i le Pulega e iloilo ai talosaga. Afai ua faamalieina tulaga faaetulafono ma isi faamatalaga e moomia, ona talia lea o lau talosaga ma faatau ai lea o iunite, ona avea ai lea o oe o se sui faiiunite. Afai e lē talia lau talosaga o le a toe faafoi atu tupe sa tuuina mai e faatau ai iunite.


E faatauina loa au iunite ma avea oe o se sui-faiiunite, o le a tuufaatasi lau seleni ma seleni a isi aufaiiunite. O le Kamupani o Pulega o le UTOS o le a faatinoa le galuega o le faafaigaluegaina lea o tupe mo le manuia o le aufaiiunite.

O le Tausi Mavaega o ia lea e umia tupe teufaafaigaluega a le UTOS. O le Tausi Mavaega ma le Kamupani o Pulega e iai le malosiaga fa’a-le-tulafono e faia ai fa’aiuga o loo moomia e faagalue ai tupe teufaafaigaluega a le UTOS.

E lē mafai e se sui-faiiunite ona faatonuina le Tausi Mavaega poo le Kamupani o Pulega ina ia pulea tupe teufaafaigaluega a le Mavaega Tausi i se faiga faapitoa, mo se faataitaiga, o le faatauina atu po o le faatau mai o se aseta. O ia faaiuga, ua taatia atu i le Kamupani o Pulega i lalo o le vaavaaiga a

le Tausi Mavaega. A mǎe'a pāsia se faaiuga a le Kamupani o Pulega, ona toe auiliilia lea ma toe aumaia se fa'amaoniga a le Tausi Mavaega poo ua ō gatasi le fa'aiuga a le Pulega ma faiga faavae o tupe teufaafaiuga a le UTOS, Taiala o Pulega Fa'atonu a le Faletupe Tutotonu o Samoa, faapea ma isi tulafono talafeagai.

O le fa'atulagaina o le Kamupani o Pulega ma le Mavaega Tausi ua fa'ailoa manino i le ata ua tuuina atu :



O le tau o le iunite, e ono suia i masina taitasi e fuafua agai i le tau aofai o tupe teufaafaiuga i totonu o le Faaputugatupe. O le Aso Lulu muamua o masina taitasi e iloilo ai lenei Tau; peitai, e iai i le Kamupani o Pulega le malosiaga e iloilo ai le tau e faatauina ai iunite i soo se taimi, ma e faatatau i le tau aōga o iunite pea iai suiga tetele i tau aoga o aseta ua fa'afaigaluegaina. O le tau o le iunite e faaogaina ai le aofaiga o meatotino maoti o le Faaputugatupe.

O tupe faasili e maua mai teugatupe teufaafaiuga, o le a faa'agaga mo le tufatufaina i sui-faiiunite. O le Kamupani o Pulega ma le Tausi Mavaega, e faia le faaiuga i se aofaiga o le tupe faasili e tufatufaina, ma faailoa le aso e faatino ai lenei manuia mo sui-faiiunite. O iunite uma o



lo’o tuuina atu i sui faiiunite taitoatasi, o se faailoga lea o a latou sea i totonu o meatotino a le Mavaega Tausi. O iunite uma e ofoina atu, e lē o vaevaeina poo tuueseeseina foi. O lona uiga, e tutusa uma aiā i iunite ta’itasi o lo’o tuuina atu po’o ofoina atu.

## **ITU E LELEI AI LE TEUFAAFAIGALUEGAINA O TUPE I LE UTOS**

*O le teuina faafaigaluega o tupe i le UTOS e mafai ona ofoina atu ai itu nei e manuia ai:*

- **Tuueseeseina** - afai e teuina faafaigaluega tupe i totonu o le UTOS, o lau tupe o le a faasoa ma teu i auala eseese e teufaafaigaluega ai seleni, (e pei o tino i tupe, sea, nonōgatupe faafeagaiga ma isi meatotino).
- **Avanoa i ituaiga eseese o Tupe Teufaafaigaluega e Tele** - A e faatauina iunite mai le UTOS, e maua le avanoa lelei e teu ai lou seleni i auala eseese tau tupe teufaafaigaluega. O se auala e lē mafai ona ausia pe ana faapea e teufaafaigaluega e na o oe lava.  
Mo se faaitaiga, o lou iunite mai le UTOS ua maua ai lou aia lē tuusao i kamupani tetele e le gata i Sāmoa nei ae faapea foi isi kamupani i isi atunuu o le Pasefika. E maua manuia mai tufatufaga mai nei kamupani pe a tologi mai tufatufaga i le tatou UTOS, ona faasoa atu laia i le aufaiiunite. O le isi tulaga, o tou seleni e nonō atu i Fa’alapotopotoga Tumaoti a le Malo faapea le Malo o Samoa e faatupe ai atinae tetele.
- **Tuufaatasia o Teugatupe e Teufaafaigaluega** – o le teuina o lou tupe i totonu o le UTOS, o le a tu’ufaatasi ma teugatupe a isi aufaiiunite, ma o le a mafai ai loa ona teuina atu tupe i poloketi ma atinae tetele, e lē mafai e se tagata toatasi ona faatupeina. O le teuina foi o au tupe i le UTOS o le a mafai ai foi ona e agava’a i tului maualuga e maua mai teugatupe faavaitaimi i faletupe.
- **Tomai Faapitoa** - E faafoeina e aufaigaluega ua lava le tomai ma le poto faapitoa lau tupe teufaafaigaluega mo oe. E telē le latou silafia, malamalama i faamatalaga, agavaa ma le tomai faapitoa tau alamanuia ma pulega lelei e ausia ai faamanuiaga faaopopo mo outou le aufaiiunite.

- **Gafatia:** E na o le 25 iunite e manaomia ona e faatauina e tatala ai sou teugatupe i le UTOS. E mafai ona toe faaopoopo le telē o lau tupe teufaafaigaluega i totonu o le UTOS e tusa ma lou manao.
- **Faigofie ona Talaina i Tua o lau Saofaga:** I le avea ai o oe ma se sui-faiiunite, e mafai ona e talaina i tua tupe na teuina faafaigaluega i totonu o le Mavaega Tausi e ala i le toe faatauina mai o au iunite i le Kamupani o Pulega poo lou faatauina atu o au iunite i se isi tagata e fia faatauina au iunite. Ae ia e silafia e iai le totogi fua pau pe a tala i tua lou seleni.
- **Tufatufaga o Tupe Faasili:** O tupe maua uma a le Faaputugatupe e mafai ona toe tufatufa atu i sui-faiiunite e ala i le vaeveaga o tupe maua. O le taumafaiga lava o le Kamupani o Pulega ma le Tausi Mavaega ina ia mafai e le Faaputugatupe ona fai se tufatufaga se tasi pe lua foi i le tausaga mo sui-faiiunite. E leai se lafoga o tupe maua mai tupe faasili e tufatufa atu i aufaiiunite mai le faaputugatupe. Ae tāua ona silafia e aufaiiunite e fua lava le tufatufaga i tulaga tau noatia o tupe ma fai fuafua i le tulaga tau tupe a le UTOS, ma e ono iai tausaga e leai ni tufatufaga pe a faletonu tala o le tupe maua.
- **Siitia o le Tau Aogā o le Iunite:** E faaopoopo atu i tupe maua mai tupe faasili, e mafai ona faaopoopo le tau aogā o iunite ina ia o gatasi ma galuega tau tupe o le Faaputugatupe. O le mea lea, e iai le avanoa e faatupuina ai le tau aogā o lau ulua’i tupe teufaafaigaluega. E silafia lea faaopoopoga peā telē atu lau tupe e talaina i tua nai loo le tupe na faatauina ai ia iunite.
- **Faamanuiaga mai Lafoga:** O aufaiiunite a le UTOS e lē totogiina se lafoga (27%) i le siitia o le tau aogā o le iunite. O le tupe mamā foi e maua mai le Faatupugatupe Teufaafaigaluega o Mavaega Tausi e lē aveesea ai se lafoga ae o le a tufatufaina atu i le aufaiiunite.

- **Puipuiga Faa-Upega Tafa'ilagi:** O loo malu ma saogalemu faamaumauga ma galuega a le Pulega ona o le faaoagina o metotia mai kamupani ua sili ona iloga i le lalolagi i tulaga tau puipuia o faamaumauga faa komepiuta.
- **Faaaogaina o Tekenolosi Faanonopo Nei:** Ua mafai ona faaoga e sui faiiunite o loo aumau i atunuu i fafo faapea ma latou o loo afifio i nuu mamao mai le taulaga ona faatau iunite e aunoa ma le tau afifio mai i le ofisa. O nei auala fou, ua faaaogaina ai le telefoni feavea'i, ma o se auala faigofie, taugofie ma saogalemu foi mo latou o loo fia avea ma sui-aiiunite.

## **TULAGA LAMATIA O LE TEUFAAFAIGALUEGAINA O TUPE I LE UTOS**

E iai foi nisi tulaga lamatia tāua, e ao ona e silafia ae le'i teuina faafaigaluega lau tupe. O tupe teufaafaigaluega uma e aafia i nei tulaga lamatia eseese ma o le faatauina mai o iunite mai le UTOS e lē pei o le teuina o tupe i totonu o se teugatupe i le Faletupe.

E tele itū tāua e ono mafai ona aafia ai vaega eseese o lo'o teufaafaigaluega ai tupe a le Faaputugatupe. Ua tuuina atu i lalo ootoga o nisi o lamatiaga e ao ona e silafia ma malamalama iai ae le'i teuina faafaigaluega au tupe i totonu o le UTOS.

- **Tulaga lamatia tau kamupani:** E ono iai se tulaga lamatia pe a faapea e paū le tau aofai (value) o se sea a se kamupani o loo teu faafaigaluegaina ai tupe a le UTOS ona o ni suiga e le'i fuafuaina i totonu o galuega faa-lotoifale o le kamupani poo le siosiomaga o loo iai i lea taimi.
- **Tulaga lamatia tau maketi:** E ono iai se tulaga lamatia pe a faapea e afaina faafuaseia le tamaoaiga poo o le suia o tulaga faapolokiki a se atunuu, e ono aafia ai tupe maua mai tupe sa teufaafaigaluega.
- **Tulaga Lamatia o le Fesuaiga o Tupe:** O le fesuaiga o tupe e ono mafai ona aafia ai i se tulaga lē manuia le tau aogā o tupe teufaafaigaluega i atunuu i fafo a le UTOS. Peitai ane, o nei tulaga fesuisuiai o le fua faatatau o le fesuaiga o tupe o loo mata'ituina ma le toto'a ma ua faia foi fuafuaga talafeagai e fōia ai soo se aafiaga lē manuia e ono tulai mai.

- **Tulaga lamatia o Faiga Faavae:** E ono iai se tulaga lamatia pe a fapea e iai se suiga i le faiga faavae a le Mālō e aafia ai le teuina o tupe teufaafaigaluega. Mo se faataitaiga, o le suia lea o le faiga faavae, ma lē talia ai ona toe faamaonia e le Mālō se nonogatupe mai le UTOS e avatu i Faalapotopotoga Tumaoti a le Mālō.
- **Tulaga lamatia o le Vave Tala i Tua:** O le faamoemoe o le Faaputugatupe o le faatupulaia o lou seleni e afua lea i le siitia o le tau aogā o le iunite; ma e fua le siitia o le tau- pe a umi ona teu lou seleni i totonu o le faaputugatupe. Ma o uiga lava ia o tupe teufaafaigaluega a le Mavaega Tausi, o le tau aogā o tupe teufaafaigaluega e fai ma fesuisuia i taimi uma. E mafai ona toe faatauina atu au iunite i le Mavaega Tausi i so’o se taimi, ae e ao pea iā oe ona e silasila totoa e tāofiofi le faatauina atu au iunite sei lava se taimi e faafaigaluega ai lou seleni.
- **Toe Totogi Faavave atu Nonogataupe Faafeagaiga:** E telē se vaega o le teugatupe faafaigaluega a le UTOS o lo’o faatupeina mai nonōgatupe faafeagaiga mai isi Faalapotopotoga a le Malo. O nei nonōgatupe e mo le ta’i 2 i le 10 tausaga faatoā totogi atu lea. A finagalo nei Faalapotopotoga a le Mālō e toe totogi atu ana tupe sa nonō mai i le UTOS ae le’i o’o i le aso e tatau ona totogi ai, o lona uiga o le a toe su’e e le UTOS nisi alatupe e totogi ai nei tupe. E telē le avanoa o le a toe aitalafu mai e le UTOS i se tului maualuga ma nisi Faalapotopotoga poo se faletupe foi e totogi faatopetope ai lea nōnōgatupe. E telē se a’afiaga i tupe faasili a le UTOS pe a tula’i mai lea tulaga.

E pei ona e silasila i itū ua tāu’a nei i luga, o le teuina o tupe teufaafaigaluega i totonu o le UTOS e iai pea tulaga lamatia ma e tāua tele lou silafia o nei tulaga ona e lē mafai ona vave iloa ma mautinoa ia tulaga lamatia. E leai se tulaga mautū e faamaonia ai *e faapea o le teuina o tupe teufaafaigaluega i totonu o le UTOS o le a telē ai ni au tupe e maua poo ni au tupe faasili mai au iunite*. E fautuaina lava lou sailia o se fautuaga faapitoa tau teugatupe ae le’i faatauina au iunite.

## **AISEA E TEUFAAFAIGALUEGAINA AI TUPE?**

Afai o oe o se faipisinisi laitiiti, se faifaatoaga, se faifaiva po’o se tasi e lē telē se tupe maua, e tuuina atu e le UTOS le avanoa ia te oe e teufaafaigaluega ai au tupe i vaega eseese aua lou manuia e ala i le faatupulaia o lau teugatupe.

Ae afai o oe o se tagata nuu Samoa o lo’o aumau i atunuu i fafo, o le teuina o au tupe i le UTOS o se ituaiga teugatupe lea ua tatau ona e silasila iai pe a e finagalo e teufaafaigaluega au tupe i Samoa, po’o lou finagalo foi ina iai se pine faamau o lou so’otaga i lou faasinomaga. A faapea ua iai ni au fuafuaga e mālōlō litaea i Sāmoa, o le UTOS o se avanoa lelei lea e teu faaputupu ai au tupe ma toe teu faafaigaluega uma iai au tupe maua mai tufatufaga o tupe faasili.

O le teuina faafaigaluega o au tupe i le UTOS e lē tutusa ma teugatupe i le Faletupe. O le teuina o tupe i totonu o Faletupe e fetau lava mo tagata e manaomia ona tala mai tua latou tupe i vaiitimi pupuu (mo taimi o faalavelave faafuasei poo pili āoga). O le teuina o au tupe teu faaputupu i totonu o le Faletupe o le auala aupito sili lea ona saogalemu mo le tausia lelei o au tupe pe a manaomia vave.

O le faafaigaluegaina o au tupe i totonu o le UTOS, e fautuaina le tuu mo se vaiitimi umi e 3 tausaga pe sili atu ma le faamoemoe o le a toe maua ai nisi tupe e sili atu na’i loo le tului e ono maua mai lau teugatupe i se Faletupe. Ia teuina faafaigaluega lau tupe i le UTOS pe afai ete finagalo e faatuputupulaia lou tamaoāiga mo se vaiitimi umi auā fuafuaga mamao; e pei o a’oaoga maualuluga mo le fanau i le lunivesite, le faatauina o sou fanua, litaea mālōlō mai le galuega, po’o le amataina foi o sau pisinisi laitiiti i le lumana’i.

## **KAMUPANI O PULEGA**

O le “Kamupani o Pulega” ua tofia ai nei le Kamupani o Pulega a le Fa’aputugātupe Teufa’afaigaluega o Mavaega Tausi (o le Pulega). O lenei Kamupani e 100% o sea o loo umia e le Malo o Samoa, e pei ona resitalaina i lalo o Faalapotopotoga Tau Fefaatauaiga a le Malo i le Tulafono o Faalapotopotoga a le Malo (Faatinoga o Galuega ma le mafai ona tali atu) 2001, ma o loo mata’ituina e le Faletupe Tutotonu o Samoa (Central Bank).

O le nofoaga o le Kamupani o Pulega e i le **fogafale tolu o le Faletupe o Atina'e o Samoa** i Savalalo -Apia.

O tiute tauave o le Pulega e aofia ai:

- le maketiina o leFaaputugatupe;
- le faia o faaiuga i le teufaafaigaluegaina o tupe mo le aufaiiunite ma sueina vaega e aupito i maualuga tupe e maua mai ai;
- le fefaatauaiga o iunite;
- le saunia o faamatalaga tau tupe a le Mavaega Tausi;
- le tufatufaina atu o Lipoti Faaletausaga a le UTOS i sui-faiiunite;
- le faia o faaiuga i le aofaiga o tupe faasili e tufatufa atu i sui-faiiunite faapea ma le vaitaimi e totogi atu ai nei tupe faasili;
- le mautinoa ua tausisia e le UTOS tulafono ma isi tulafono faatonutonu.
- lloiloa toto'a tulaga lamatia ai teugatupe a le Mavaega Tausi.

O le Minisita o Tupe, o ia lea e gafa ma le Kamupani o Pulega e pei ona faatulagaina i lalo o le Tulafono mo Faalapotopotoga a le Malo (Faatinoga o Galuega ma Faamaumauga Manino) 2001. E toalima (5) sui auai o le Komiti Faatonu ("Faatonu") a le Kamupani o Pulega, ua tofia e le Kapeneta i ala i le fautuaga a le Minisita o le Matagaluega o Tupe.

O Sui o le Komiti Faatonu, faapea le Ofisa Sili o Pulega, ua lava le tomai ma le agavaa e tauaveina ai a latou tiute ma galuega ua tofia ai, ma o le ā avea lea ma se fesoasoani tele i le fa'atinoina o tiute tauave a le Kamupani o Pulega ma le Fa'aputugātupe.

## **LE TAUSI MAVAEGA**

O le Aso 1 o Ianuari 2018 na amatalia ai le Tafailagi Trustee Co Ltd i le tofiga "Tausi Mavaega".

O le "Tausi Mavaega" o le Tafailagi Trustee Co Ltd Limited, o se kamupani sa pāsia e le Minisita o Tupe e pei ona manaomia ai i le fuaiupu 6 o le Tulafono o Faaputugatupe Teufaafaigaluega o Mavaega Tausi 2008. Na talia foi e le Pulega Faatonu a le Faletupe Tutotonu o Sāmoa le avea o

le Tafailagi Trustee Co Ltd ma le Tausi Mavaega mo le UTOS e tusa ai ma Taiala o Pulega Faatonu a le Faletupe Tutotonu o Sāmoa.

O le matāfaii sili a le Tausi Mavaega o le faa-mautinoa lea o lo’o galue le Pulega mo le tulaga aupito i manuia mo aufaiiunite a le Faaputugatupe. O faatonu o le Tausi Mavaega i le aso o lenei Faamatalaga Tau Alamanuia o le Afioga ia Taito John Roache ma Luana von Reiche-Roache.

O tiute tauave o le Tausi mavaega e aofia ai:

- le puipuia o aiā tatau a sui-faiiunite
- le resitalaina o meatotino a le Faaputugatupe mo aufaiiunite
- le faa-mautinoa o loo tausisi le Pulega i le Pepa Faamaonia o Feagaiga o Mavaega Tausi
- le faa-mautinoa o lo’o tausisia e le Pulega ta’iala e pei ona iai i totonu o le Faiga Faavae o Tupe Teufaafaigaluega a o faatino faaiuga mo vaega eseese e teufaafaigaluega ai tupe a le aufaiiunite

O le Ofisa Faamauina o le Tausi Mavaega e i le:

Poinsettia House,

Malifa, Apia, Sāmoa

Pusa Meli- P.O Box 38, Apia, Sāmoa.

## **SUETUSI O LE FAAPUTUGATUPE**

E tusa ai ma le Pepa Faamaonia o Feagaiga o Mavaega Tausi, e tōfia e le Kamupani o Pulega le Suetusi, i se feūtaga’iga ma le Tausi Mavaega. E na o Suetusi Aloai’a poo o se Faalapotopotoga faa-Suetusi Aloai’a e taliaina, ma e tolu (3) tausaga e faa-konekarate ai ma le Mavaega Tausi.

E mafai ona aveesea i soo se taimi e le Pulega le Suetusi mai lona tofi, poo se iugafono faapitoa a aufaiiunite. E mafai ona faamavae aloaia le Suetusi pe a momoli mai lona tusi faamavae e lē itiiti ifo i le 90 aso o le faasilasilaga tusitusia i le Pulega.

O le suetusi a le faaputugatupe i le aso o lenei Faamatalaga Tau Alamanuia o le Ah Chong Chartered Accountants.

## **LE PULE FAATONU**

I lalo o le Tulafono, o le Faletupe Tutotonu o Samoa o le Pule Faatonu lea a le Faaputugatupe Teufaafaigaluega o Mavaega Tausi a Samoa. O le UTOS e galue fa'atulafonoina i Taiala o Pulega Faatonu a le Faletupe Tutotonu o Samoa 2015 ma le Tulafono o Tupe e Maua mai i Soligatulafono 2007.

O nei taiala na faavaeina e tusa ma le Vaega 3 o le Tulafono o Faalapopotoga Tau Tupe 1996 ma ona Teuteuga o le Tulafono 2012. O nei taiala e fofola mai ai a'iaiga auā le iloilo ina poo fetau le teufaafaigaluega mai o seleni a tagata ma kamupani i leni faaputugatupe. E tusa ma nei taiala, o le Kamupani o Pulega a le Fa'aputugātupe Teufa'afaigaluega o Mavaega Tausi (o le Pulega) ma le Tafailagi Trustee Company Ltd ua agavaa ma fetau i nei tofiga o le "Pulega" ma le "Tausi Mavaega" a le UTOS.

O Taiala o Puipuiga mai Tupe e Faaofi mai Faasolitulafono e lima-taitaina ai aufaiiunite ma le aufaigaluega a le UTOS e iloilo ma le toto'a auala na maua mai ai seleni, ma ia faamaonia o nei seleni e le'i maua mai i auala Faasolitulafono. O Aufaiiunite, Sui o le Komiti o Faatonu ma le aufaigaluega a le UTOS, e lē tatau ona talia ni Tupe e Faaofi mai Faasolitulafono.

O lo'o iai le taiala tusinga a le Fale Tupe Tutotonu a Samoa o lo'o māioio mai ai a'ia'iga o le teufa'afaigaluegaina o tupe. O leni taiala e lima-taitaiina ai galuega fai a le Kamupani o Pulega a le UTOS. E tatau ona malamalama le Kamupani o Pulega, o so'o se tupe e teufaafaigaluega e fafo ifo ma nei taiala, e manaomia le pāsia muamua e le Fale Tupe Tutotonu a Sāmoa. A masalomia e le Kamupani o Pulega se sui faiiunite o lo'o teuina pe fia teuina se seleni na auala mai Faasolitulafono, e tatau e le Pulega na logo le Vaega o Suesuega Faapitoa o Faamatalaga Tau Tupe a le Fale Tupe Tutotonu a Sāmoa.

## **TAU, TOTOGIFUAPAUINA MA TAU FAAEE ATU**

I le faatupeina o le Kamupani o Pulega ma le faagaioiga o le Mavaega Tausi, o totogifuapauina ma tau faaee atu o loo iai i le taimi nei, ua malilie iai le Pulega ma le Tausi Mavaega ma o tau o



loo tāua mulimuli mai, e mafai ona totogiina e tusa ai ma le Pepa Faamaonia o Feagaiga o Mavaega Tausi:

<p><b>Totogifuapau mo le talaina I tua o iunite</b></p>	<p>E 1% le Totogifuapau mo le talaina i tua o iunite. O lea Totogifuapau e taofi e le Kamupani o Pulega auā galuega faatino mo le Faaputugatupe. E tatau ona malilie ai le Kamupani o Pulega ma le Tausi Mavaega i lea Totogifuapau, ma e ono suia mai lea taimi i lea taimi. E tatau foi ona logo aufaiiunite pe a sui pasene o lea Totogifuapau.</p>
<p><b>Fesiitaiga o Iunite</b></p>	<p>O le tau e fesiitai atu ai Iunite e 1% o le tau aoga o le aofaiga o iunite o lea fesiita'i. O lenei totogifuapau e totogiina e le sui fai iunite ua manao e fesuia'i iunite i le Kamupani o Pulega (pe a faaulu le talosaga e faamauina ai le aveeaisea o iunite mai lona pulega).</p>
<p><b>Totogifuapau a le Kamupani o Pulega.</b></p>	<p>Mai le aso o lenei Faamatalaga tau Alamanuia, O le totogifuapau a le Kamupani o Pulega e tusa ma le 1.40% i le tausaga o aofaiga atoa o meatotino a le Mavaega Tausi. E totogiina lenei tau e le UTOS i le Kamupani o Pulega i masina taitasi. E mafai ona malilie le Kamupani o Pulega ma le Tausi Mavaega e sui pasene o lea Totogifuapau.</p>
<p><b>Totogifuapau mo le Tausi Mavaega.</b></p>	<p>Mai le aso o lenei Faamatalaga tau Alamanuia, o le totogifuapau a le Tausi Mavaega e tusa ma le \$30,000 i le tausaga faaaopopo ai ma le 0.5% i le tausaga o aofaiga o Tupe Faasili a le Mavaega Tausi. O lenei totogifuapau e totogi atu e le Kamupani o Pulega i le Tausi Mavaega i masina taitasi.</p>
<p><b>Tupe Fa'aalu</b></p>	<p>I lalo le Vaega 16.2 o le Pepa Faamaonia o Feagaiga o Mavaega Tausi, e mafai e le Kamupani o Pulega ona totogi tupe fa'aalu e faasino i le faagaioiga o le Mavaega Tausi ma e tatau ona toe totogi e le Mavaega Tausi seleni a le Kamupani o Pulega sa faaaogaina.</p>

<b>Totogifuapauina a Tagata Faufautua</b>	E mafai e le Tausi Mavaega ona tofia tagata faufautua ma totogi atu se totogifuapau ma tau faaee atu ia latou mo latou auaunaga mai Meatotino a le Mavaega Tausi
<b>Isi Totogi Faatulagaina</b>	<p>E \$10 tala le tau faatulagaina mo auaunaga nei;</p> <ul style="list-style-type: none"> <li>• Suia o le Suafa o lo’o faamauina mo le Teugatupe Faafaigaluegaina</li> <li>• Toe lolomiina o le Pepa faamaonia mo Tupe Teufaafaigaluega mai le UTOS</li> <li>• Tusi faamaonia mai le UTOS e faatatau i le teugatupe.</li> <li>• Suia o le Saini mo teugatupe faafaigaluega a tagata taitoatasi, poo teugatupe tuufaatasi. O teugatupe faafaigaluega mo tagata e toatolu pe sili atu, o le a fuafua le tau faatulaga pe a mǎe’a ona iloiloina a latou mataupu tasitasi.</li> </ul> <p>E \$50 tala le tau faatulaga mo tusi faamaonia mo Suetusi</p>

## TAU O LE IUNITE

E faatatau le tau o le iunite i luga o se faatulagaga faale-masina, sei vagana ua faia se isi faaiuga mai le Kamupani o Pulega. O le tau o le iunite, o le a faalauiloa i le mamalu o le atunuu i Aso Lulu muamua uma o masina taitasi; sei vagana o se aso mǎlolō, ona tolopo lea o le tuuina atu o le tau o le iunite i le aso faigaluega e sosoo ai.

Ia silafia ma ia manino, o le faatauina atu o iunite i so’o se tasi, soo se faalapotopotoga poo o se pisinisi, e faatauina atu lea i le **“Tau e Faatauina ai”**.

E mafai e le sui-faiiunite ona toe faatau ese ana iunite i le Mavaega Tausi, i le **“Tau e Talaina ai i tua”**

Ua faatulagaina tau e faapea:

Tau e Faatauina ai = Tau o le iunite

Tau e Talaina ai i tua = Tau o le iunite – Totogifuapau mo le Talaina i tua o le iunite

E tusa ai ma le Pepa Faamaonia o Feagaiga o Mavaega Tausi, o le tau o le lunite, e maua mai vaega nei:

Vaega (1) faaopoopoina faatasi o:

- (a) le Tau Aogā o Meatotino uma o le Mavaega Tausi; ma
- (b) isi aofaiga, ua manatu le Pule, e ao ona aofia sea uma ua tuufaatasia mo le faamoemoe o le faia o se faaiuga i tau aogā faa-maketi o le tau aogā atoa o le Mavaega Tausi i le amanaia tatau ai o faiga faataatitia Faavā o Mālō o lipoti faaletupe (e pei ona faaogāina e le Faalapotopotoga o Tausi Tusi a Sāmoa). [faatasi ai ma soo se teuteuga ua manatu le Pule e ao ona faia i lea faaiuga e tusa ma le tuufaatasiga o aseta poo meatotino]:

Vaega (2) toese mai le aofaiga ua maua i le vaega (1) o i luga:

- (a) noataga uma o le Mavaega Tausi; ma
- (b) soo se aofaiga, ua manatu le Pule e tatau ona aofia i sea tuufaatasia mo le faamoemoe o le faia o se faaiuga sa’o ma talafeagai o le tau aogā atoa o le Mavaega Tausi i le amanaiaina o tulaga faataatitia Faavā o Mālō o lipoti faaletupe (e pei ona faaogāina e le Faalapotopotoga o Tausi Tusi a Samoa). [faatasi ai ma soo se teuteuga ua manatu le Pule e tatau ona faia i le fuafuaina o se faaiuga i ia teuteuga]

Vaega (3):

ona vaevaeina le aofaiga o totoe mai le faatinoga o vaega (1) ma le (2) i le aofaiga o lunite ua tuuina atu i lena taimi. O le a tatau ona faitauina le aofaiga atoa i se aofai e latalata i sefuainumera faatesimale e lua o se lunite i se auala ua filifilia e le Pule.

I se faaupuga faigofie, o le Tau o le lunite o le aofaiga atoa lea o meatotino o loo totoe (e aofia ai soo se fetuunaiga e fuafuaina e le Pule ua talafeagai, ina ia atagia ai le tau aogā talafeagai o meatotino a le Faaputugatupe) vaevaeina i le aofaiga atoa o lunite ua tuuina atu i lea taimi.

## **PEPA FAAMAONIA O FEAGAIGA**

E ao ona galue i taimi uma le Faaputugatupe a le UTOS ina ia o gatasi ai ma Teuteuga o le Pepa Faamaonia o Feagaiga o Mavaega Tausi 18 Tesema 2017.

E mafai ona maua se kopi o le Pepa Faamaonia o Feagaiga o le Mavaega, i le Ofisa o le Kamupani o Pulega i se tau o le a tuuina atu e le Kamupani o Pulega. E mafai foi ona maua se kopi i luga o le upega tafa'ilagi a le UTOS e aunoa ma se totogi.

E mafai ona suia le Pepa Faamaonia o Feagaiga o le Mavaega Tausi, ae afai o le a āfaina ai aiā tatau a i latou o loo teufaafaigaluega a latou seleni i le Mavaega Tausi, e ao i le Tausi Mavaega ona muai sailia se faamaoniaga poo se iōega mai le aufaiiunite (i se fonotaga) ae le'i faatinoa lea faaiuga.

## **AIAIGA MO LE TUUINA ATU O FAAMAUMAUGA O LE AUFIIUNITE**

E tusa ai ma le Vaega 21 o le Tulafono mo Faaputugatupe Teufaafaigaluega o Mavaega Tausi 2008, e tatau i le Kamupani o Pulega ona tuuina atu uma faamaumauga o aufaiiunite i le Resitala ae le'i maea le Aso 31 o Mati i tausaga taitasi. O le Resitala o lo'o gafa ma le Matagaluega o Pisinisi, Alamanuia ma Tagata Faigaluega.

O faamaumauga uma e tatau ona tuuina atu e aofia ai:

- 1) Le lisi o suafa ma tuatusi o aufaiiunite uma e pei ona iai i le Aso 31 Tesema i tausaga taitasi, faapea ma le aofaiga o lana iunite o lo'o iai i totonu o le faaputugatupe; ma
- 2) le faamatalaga e faamatalaina ai vaega nei:
  - (i) Aofaiga ma aso na faia ai tufatufaga o tupe faasili i le aufaiiunite i totonu o le 5 tausaga faatoa maea atu;
  - (ii) Aofiaga o tufatufaga na faia;
  - (iii) Tulaga uma sa faatino ai le faia o nei tufatufaga pe a faapea e le o ni tinoitupe ma ni tului po'o ni ponesi.
- 3) Faamatalaga o tupe a le Mavaega Tausi; ma
- 4) Faamatalaga o meatotino uma na faatauina ma toe faatau ese i lalo o le Mavaega Tausi; ma

- 5) Lisi o teugatupe a le Mavaega Tausi e pei ona iai i totonu o tusi i le faaiuga o le tausaga faale-tupe
- 6) Tupe fa'aalu ma le fuafaatatau o le tau aoga o meatotino ma teugatupe

## **FAAMAVAE, AVEESEA MA LE SUIA O LE PULE**

E mafai ona aveesea le Pule mai lona Tofi i lalo o taiala faataatitia e faapea:

- (a) E ala i se poloaiga a le Faamasinoga Sili i luga o se talosaga a le Tausi Mavaega, tasi vae sefulu pasene o le aofai o aufaiiunite, poo o le Minisita;
- (e) Pe afai ua faamaonia e le Tausi Mavaega e faapea mo le manuia o aufaiiunite e faamuta ai ona toe umia e le Pulega lona tofi;
- (i) E ala i se iugafono a aufaiiunite (e umia le tolu-kuata o le aofaiga o iunite a le faaputugatupe) i se fonotaga ua usuia e tusa ai ma le Pepa Faamaonia o Feagaiga o Mavaega Tausi;
- (o) Ua faataapeina meatotino poo ua faamaapeina meatotino a le Pule; poo
- (u) Ua faamutaina le umiaina e le Kamupani o Pulega o se laisene tau pisinisi lea e manaomia i le tulafono ona ia umia, ina ia mafai ai ona galue e avea o se Pule o le Mavaega Tausi.

E mafai ona faamavae le Pule i soo se taimi, e aunoa ma le tuuina atu o soo se mafuaaga, ma ia tuuina atu se faasilasilaga tusitusia e 90 aso i le Tausi Mavaega mo lona faamoemoe o le a faapea ona aloaia. E lē tatau ona aloaia se faamavaega seia vaganā ua tōfia se Pule fou ma ua saunia se pepa faamaonia o feagaiga.

## **FAAMAVAE, AVEESEA MA LE SUIA O LE TAUSI MAVAEAGA**

E mafai ona aveesea le Tausi Mavaega mai lona Tofi i lalo o taiala faataatitia e faapea:

- (a) E ala i se poloaiga a le Faamasinoga Sili i luga o se talosaga a le Kamupani o Pulega poo le Minisita.

- (e) E i le Minisita o Tupe le malosiaga e aveesea ai le Tausi Mavaega i lalo le Vaega 6 (1) (b) o le tulafono pe a faapea o le Minista o Tupe sa tofia le Tausi Mavaega.
- (i) E mafai ona faamavae le Tausi Mavaega i soo se taimi, e aunoa ma le tuuina atu o se mafuaaga, faatasi ai ma se faasilasilaga tusitusia e 30 aso i le Kamupani o Pulega mo lona faamoemoe o le a faapea ona aloaia. E lē tatau ona aloaia se faamavaega seia vagana ua tofia se Tausi Mavaega fou ma ua liliu ai mea totino maoti a le faaputugatupe.

## **AUFIIUNITE**

O aufaiiunite uma e iai aiā tatau i meatotino a le Faaputugatupe Teufaafaigaluega o Mavaega Tausi a Sāmoa. Peitai, e lē mafai ona tuuina atu i se aufaiiunite se aiā tatau e pulea ai soo se meatotino maoti, pe faaee atu ai lona pule toatasi i luga o le Faaputugatupe. O aufaiiunite uma e iai aiā tatau i le Faaputugatupe a le UTOS, ae e noatia ma fuafua tatau i tuutuuga o le Pepa Faamaonia o Feagaiga o Mavaega Tausi.

A avea oe ma se sui-faiiunite ua e agavaa loa i le:

- Mauaina lea o sea o tupe maua a le Faaputugatupe
- Mauaina lea o tufatufaga o tupe faavae pe afai e toe faatauina mai
- Mafai ona toe faatauina mai pe toe faaolaina mai iunite
- Faase'e atu le pulea o iunite i se tagata o loo umia soofaatasi (o loo soifua pea) poo i se isi faiga e ese ai i se esetete a se tasi pe afai ua maliu se tasi
- Auai ma palota i fonotaga a aufaiiunite
- Auai i tufatufaga pe a faamutaina pe faamaapeina le Mavaega Tausi
- Mauaina faamatalaga o le taliaina o iunite o tupe teu o lo o umia
- Mauaina lea o le Lipoti Faaletausaga i le faatinoga o le Mavaega Tausi
- Asiasia le Pepa Faamaonia o Feagaiga o Mavaega Tausi

## **O NOATAGA I LE AVEA AI O OE MA SE SUI-FIIUNITE**

E fua le noataga a aufaiiunite i le tau aogā o a latou iunite o lo'o teufaafaigaluega.

## **FONOTAGA A AUFAIIUNITE**

E mafai e le Kamupani o Pulega ona talo se fonotaga a aufaiiunite i soo se taimi. E ao ona tuuina atu se faasilasilaga tusitusia o se fonotaga a aufaiiunite, i se taimi e lē itiiti ifo i le 14 aso mai le aso e faataunuu ai le fonotaga. E tatau ona tapena ma tufatufaina e le Kamupani o Pulega le Lipoti Faaletausaga a le Faaputugatupe ae le'i faia le fonotaga faaletausaga.

E ao i le Kamupani o Pulega ona taloina se fonotaga pe afai ua talosagaina e le Tausi Mavaega, poo le aofaiga e lē itiiti ifo i le tasi-vae sefulu o le aofai o aufaiiunite a le Mavaega Tausi, po o se sui faiiunite o lo'o umiaina le aofaiga e le itiiti ifo i le tasi-vae sefulu o le tau aogā o iunite o tupe teu i le Mavaega tausī.

### **Fainumera o le au usufono e pāsia ai se fonotaga:**

- Mo le pāsiaina o se iugafono mātuiā: e manaomia le iai o ni sui faiiunite e lē itiiti ifo i le toalima, ma nei sui aufaiiunite e tatau ona lē lalo ifo ma le 25% le aofai o iunite a le Mavaega Tausi e pulea e latou, i le Aso o le fonotaga
- Mo le pāsiaina o se iugafono masani: e manaomia le iai o ni sui faiiunite e lē itiiti ifo i le toalima, ma nei sui aufaiiunite e tatau ona lē lalo ifo ma le 10% le aofai o iunite a le Mavaega Tausi e pulea e latou, i le Aso o le fonotaga.

Soo se fonotaga a sui faiiunite e ausia ai le fuianumera e tasi kuata o le tau aoga o iunite a le Tausi Mavaega, o le a iai le latou malosiaga e ala i se iugafono e tuuina atu ai se faatonuga i le Tausi Mavaega, e pei ona latou manatu ua talafeagai mo le Mavaega. E ao i lenei faatonuga ona ōgatasi ma ai'a'iga o le Pepa Faamaonia o Feagaiga o Mavaega Tausi ma le Tulafono o Faaputugatupe Teufaafaigaluega o Mavaega Tausi 2008.

Afai ua tuuina atu se faatonuga, e mafai e le Tausi Mavaega ona usitaia lea faatonuga ma e lē tatau ona noatia i soo se mea ua faia poo ua lē faia e ia, e mafuai lona usitaia o lea faatonuga poo fautuaga. Afai ua iai le manatu i le Tausi Mavaega e faapea ona fetuunai se faatonuga ua tuuina atu e le Mavaega Tausi, pe iai foi se popolega i le faatonuga ua tuuina atu, e mafai e le Tausi Mavaega ona talosaga i le Faamasinoga mo se fautuaga poo se faatonuga.

## **TOE FAATAUINA MAI O IUNITE**

E mafai e sui-faiiunite ona toe faatauina atu iunite i le Kamupani o Pulega. Ua tãu'a lenei faiga "toe faatauina mai" o au iunite o tupe teu. E iai le malosiaga a le Kamupani o Pulega e teena ai le toe faatauina mai o iunite pe afai e uma ifo ua lalo ma le 25 iunite lou paleni e avea ai oe ma se sui faiiunite.

I le toe faatauina mai o iunite, o le aofai e mafai ona totogiina i le sui-faiiunite e tatau ona avea i le tau o le faatauina mai o le iunite, toese ai le 1% o le Totogifuapau e Talaina ai i tua iunite.

E iai taimi e manatu ai le Kamupani o Pulega, e lē talafeagai ona talia se toe faatau mai o ni iunite ona o se aafiaga lē manuia mo aufaiiunite, ma e ono aafia ai foi le Mavaega Tausi ma le Kamupani o Pulega pe a toe faatauina mai iunite. Afai o lea, e mafai e le Pulega ona faauiese mo se taimi lē tumau le toe faatauina mai o iunite seia manatu le Pulega, ua talafeagai ona toe faatino le faatauina mai o iunite.

O le uiga o lenei tulaga pe a faapea e tulai mai, e ono faatuai ona maua le tupe faaaopopo ma le tupe teu faafaigaluega i le Mavaega Tausi.

## **FESIITAIGA O IUNITE**

E mafai e sui-faiiunite ona fesiitai aofaiga atoa poo se vaega o latou iunite i se isi tagata poo se faalapotopotoga e ala i le faia ma tuuina atu i le kamupani o Pulega se Pepa Faatumu o le a fesiitai o iunite. O le tau e fesiitai ai iunite; e pule faitalia ai lē o loo faatauina atu ma lē ua malie e faatauina mai.

O le totogifuapau mo le fesiitai atu o au iunite i se isi tagata i le taimi ua tuuina atu ai lenei Faamatalaga tau Alamanuia, e 1% o le aofaiga o le tau aoga o iunite o lea e fesiita'i. . O lea totogifuapau e le mafai ona toe faafo'iina atu. Faamolemole faafeso'otai le Kamupani o Pulega mo lea totogifuapau i le taimi e fesiitai ai iunite. O lenei totogifuapau e totogina e le tagata ua malie e fesiitai atu poo lē e umia le faaputugatupe, faatasi ai ma le Pepa Faatumu mo le fesui'a'i o iunite.



A uma ona faatumu le pepa talosaga atoa, faamaumauga talafeagai ma ua mae'a foi ona totogi le totogifuapau mo le fesiitai o Iunite, o le a faamauina loa e le Kamupani o Pulega le tagata fou e pulea ia iunite i le Tusi Resitala a le Mavaega Tausi mo aufaiiunite.

E mafai e le Kamupani o Pulega ona teena se fesiitaiga o iunite i tulaga nei:

- a) afai e le'i tuuina atu se Pepa Talosaga mo le Fesiitai o Iunite i le Kamupani o Pulega, po'o ua lē usitaia se a'ia'iga faaletulafono;
- e) o le faamauina o le fesiitai atu o iunite, o le a faaititia ai le Aofaiga Aupito maualalo o Iunite (i le taimi nei e 25) o lo'o i lalo o le igoa o lē e pulea Iunite;
- i) afai o lo'o iai ni aitalafu a le sui faiiunite e le'i totogiina i le Tausi Mavaega po'o le Kamupani o Pulega;
- o) Pe afai ua le totogiina atu le totogifuapau i le Pule.

## **TUFATUFAGA O TUPE FAASILI I LE AUFAIIUNITE**

E lē mautinoa ni tufatufaga o tupe faasili i aufaiiunite i tausaga uma. O tufatufaga, o le a faalagolago pea i le tulaga tau tupe faasili o le Faaputugatupe faapea ma le aofaiga o tinoitupe e faagasolo ai galuega. E tumau pea i le Pule le faitalia e totogi atu ai soo se faasoasoaga ma toe teufaafaigaluega ai tupe maua uma o le Faaputugatupe.

O tupe faasili ua maua mo le tufatufaga, o le a tufatufaina lea e tusa ma le fuainumera o Iunite o lo'o latou umia i le Aso o le faasalalauga.

## **LIPOTI FAALETAUSAGA**

O le tausaga faale-tupe mo le Faaputugatupe e faai'uina i le Aso 30 o Iuni i tausaga taitasi. E agavaa uma sui-faiiunite i le lipoti faale-tausaga e faamatala mai ai galuega faatino ma tala o le tupe a le faaputugatupe, faatasi ai ma le vaai mamao ma tulaga lamatia sa iai galuega i le tausaga.

E tatau ona faao’o atu se lipoti faale-tausaga o le tala o tupe mo aufaiiunite i totonu o le 3 masina (po’o se isi vaihimo e pei ona malilie iai le Kamupani o Pulega ma le Tausi Mavaega) mai le faaiuga o le tausaga faale-tupe. E mafai ona maua kopi o le lipoti faale-tausaga i le Ofisa po’o le upega tafa’ilagi a le UTOS.

## **TAPUNIA O LE RESITALA**

E mafai e le Pulega ona tapunia le Resitala mo se vaihimo po’o ni vaihimo ua finagalo iai le Kamupani o Pulega. E lē mafai ona tapunia le Resitala mo se vaihimo e sili atu i le 30 aso i se tausaga e tasi.

## **FAAMAPEINA MA LE FAAMUTAINA O LE MAVAEGA TAUSI**

O lenei Faaputugatupe ua faamoemoe o le a fa’aaauu pea lana auaunaga i totonu o se vaihimo e lē o mafai ona faamautūina i lenei taimi, peitai e mafai lava ona faamutaina i se taimi ona o mafuaaga nei:

- (a) o le aso ua filifilia e le Kamupani o Pulega e ala i le tuuina atu o se faasilasilaga tusitusia a le Pulega, ia lē itiiti ifo ma le tolu masina, i aufaiiunite ma le Tausi Mavaega;
- (e) le aso ua faatulaga mai i se iugafono faapitoa a Aufaiiunite;
- (i) le aso lea e faamutaina ai le Mavaega Tausi i lalo o le Pepa Faamaonia o Feagaiga o Mavaega Tausi poo se faatonuga i lalo o le Tulafono.

## **POLOKALAME MO LE RESITALAINA O IUNITE**

I le Aso 14 o Fepuari 2017, na faalauiloa aloaia ai le polokalama mo le resitalaina o iunite i luga o upega tafailagi. O lenei polokalame e mafai ai ona siaki e aufaiiunite latou paleni i luga o upega tafailagi e faaaogaina ai telefoni fe’aveai mai so’o se itu o le lalolagi.

Ona o nei auaunaga faa-tekonolosi faatasi ai ma polokalame a telefoni feavea’i, ua mataitūina e le aufaigaluega le fa’atupulaia o lamatiaga e mafua mai i feso’otaiga fa’aonaponei i le lalolagi. O

le ala lea o lo'o tumau ai pea le fa'amalosia o le va'aiga o le saogalemu o nei feso'otaiga, i le fa'atinoina lea ma le ilo'iloina o lipoti o galuega i aso taitasi e tali atu ai i nei tulaga lamatia. Ua siitia tulaga tau puipuia o tatou feso'otaiga fa'atekonolosi i la'asaga mauuluga mo le puipuiga o aseta faatekonolosi. O le tulaga foi lea, o lo'o galue ai faletupe lauiloa o le lalolagi ia tumau pea faiga fa'afeso'otaiga e sili lona malupuipuia.

## **FAAMATALAGA MO LE FAATUMUINA O LE PEPA TALOSAGA MO LE FAATAUINA O IUNITE**

E ao i tagata e teufaafagaluegaina a latou tupe ona faitauina nei faamatalaga pe a faatumuina pepa talosaga.

E fa ituaiga tusi talosaga mo sui-faiiunite.

- 1. TALOSAGA TAGATA TA'ITOATASI:** O tusi talosaga mo tagata taitoatasi e ao ona faatumu ma sainia e le tagata lava ia, po'o le loia e faatagaina ai le tagata talosaga poo lana tausi mavaega.

Afai ua sainia se pepa faamaonia mai se Loia mo le malosiaga e avea ai ma sui, e ao ona tuuina atu le pepa aloaia talafeagai mo le faamauina e le Kamupani o Pulega.

- 2. TALOSAGA A TAGATA O TUU FA'ATASI:**

- (I) E mafai ona oo atu i le 3 le numera o sui e umia faatasi iunite.
- (II) E tatau uma i sui ona faatumu ma sainia vaega uma o le tusi talosaga.
- (III) E tatau e sui nei ona tuu mai faatonuga i le UTOS e faatatau i le faatauina ese atu o Iunite, ma le faatautaia o a latou Iunite.
- (IV) A sili atu loa i le 3 sui e umia faatasi iunite, e tatau ona faatumu le Talosaga mo le Faatauina o Iunite mo Faalapotopotoga/Komiti.

- 3. PISINISI**

- (I) *KAMUPANI:* O tusi talosaga a kamupani e ao ona sainia e le Taitaifono ma seisi Sui Faatonu (a toatasi le faatonu, ia sainia e ia lenei tusi talosaga). E tatau ona mae'a Resitala lea kamupani i le Resitala o Kamupani a Samoa.

(II) *TUSI TALOSAGA I LALO O FAIGA FA'APAAGA:*

O tusi talosaga mo faiga faapaaga e ao ona faatumuina ma sainia e sui uma o le faiga paaga. E tatau ona tofia se paaga e tasi o loo resitala mo le faatautaia o lunita mo paaga uma.

(III) *TAUSI MAVAEAGA:*

E ao ona faatumuina tusi talosaga a le Mavaega Tausi ma sainia e Tausi Mavaega se toalua poo Tausi Mavaega o le Mavaega Tausi;

**4. FAALAPOTOPOTOGA**

I. **SOSAIETE FAALETULAFONOINA:**

- i. Tusi talosaga a sosaiete faaletulafono e ao ona faatumuina ma sainia e sui se toalua pe sili atu ua faatagaina e le sosaiete/faalapotopotoga.
- ii. E tatau ona tuuina mai faatasi ma le talosaga tusitusiga faamaonia e faailoa mai ai ua tofia e le sosaiete/faalapotopotoga nei sui e toalua pe sili atu foi e umia ma faatautauia le faatauga o lunita mo le sosaiete/faalapotopotoga.

II. **FAALAPOTOPOTOGA / SOSAIETE E LEI FAATU FAALETULAFONO:**

- i. talosaga uma a sosaiete ma fa'alapotopotoga e lei faatuina faaletulafono e tatau ona fa'atumu ma sainia e sui e to'alua pe sili atu i lalo o se fa'atagana po'o se maliliega autasi a sui o le sosaiete po'o le fa'alapotopotoga.
- ii. E tatau ona aumai faatasi ma le talosaga se tusi faamaonia; se saina-galima a sui e le silia ma le to'alima o le sosaiete/fa'alapotopotoga.
- iii. O le sui muamua o lo'o fa'amauiina i le Resitala e iai lana aiā tatau e avea ai o ia ma Sui muamua i totonu o le talosaga. So'o se fa'amatalaga ma pepa fa'amaonia o le a tu'uina atu i le sui muamua. O le a faapea ona tuuina atu

i lea sui faasilasilaga ma tusi faamaonia le uma o luniti. O le a faapea foi ona tuuina atu uma tupe maua mai luniti i le suafa o le sui muamua, sei vagana ua tuuina faatasi mai ma le talosaga se fautuaga a le faalapotopotoga/sosaiete i le Pulega e suia ai lea faiga faavae.

- iv. So’o se faatonuga lava e tuuina mai i le Pulega e tatau ona tuuina faatasi mai e sui ua tofia, e aofia ai ma le faatauina ese atu o luniti, mo le faatautaia o a latou luniti, ma o le a aofai ai sui uma o le faalapotopotoga/sosaiete i lea faatonuga.

E mafai ona maua mai se kopi o nei tusi talosaga i le Kamupani o Pulega a le UTOS, poo le Ofisa o le Pulega e Fa’atonutonuina Petipetiga (GCA) poo le asia o le Upega Tafailagi [www.utos.ws](http://www.utos.ws).

## **MAVAEGA A LE SUI FAIUNITE**

Afai e faamaonia le tuumalo o se sui faiiunite, ona see lea o ana iunite / teugatupe e pulea e se tasi sa ia filifilia ma faamauina e le ofisa. I le taimi e talosagaina ai le tatala o se teugatupe mai le UTOS, e ao ona manino ma faailoa aloaia mai i le tusi talosaga, le suafa o lē ua e malie e faamanuiaina i au iunite pe a fotua’i mai se faalavelave.

Afai e tuumalo se Sui faiiunite faapea ma sui filifilia e faamanuiaina i iunite, ona sailia lea e le Kamupani o Pulega se mavaega a le sui faiiunite, ma usitaia lea mavaega.

Ae afai e leai se mavaega, ona faase’e laia o lea teugatupe i le Ofisa o Mavaega Tausi mo se latou faaiuga talafeagai, poo ai e faamanuiaina i lea teugatupe.

## **O FESILI MASANI**

- 1) *O ai e mafai ona teufaafai aluega a latou seleni i le UTOS?*

E na o tagata nuu Sāmoa poo latou ua nofomau i Samoa e mafai ona teu latou seleni i totonu le UTOS. Pisinisi ua resitala i totonu o Samoa, faalapotopotoga faa-le-nuu, faa-le-lotu, kalapu, sosaiete ma isi asosi ua resitala i totonu o Samoa ma e pulea e tagata nuu Samoa e mafai ona teufaafaigaluega a latou seleni.

2) *E mafai ona teufaafaigaluega seleni a le fanau?*

E tatau ona 18 tausaga le matua e fai ai se teugatupe i le UTOS. Mo tamaiti e laititi ifo ma le 18 e mafai ona tatala se latou teugatupe pe a faatumu ma saini e o latou mātua.

3) *E faafefea ona faatau sa’u iunite?*

E tatau ona faatumu muamua lau Pepa Talosaga mo le Faatauina o Iunite e talafeagai mo oe, lou aiga po’o faalapotopotoga. Tau a’ao atu lau Pepa Talosaga ua uma ona faatumu ma saini, ia lua (2) pepa faomaonia (IDS) ma lou seleni i le UTOS ona faagaioi lea o lau talosaga.

4) *O fea e fa’atau ai iunite pe tatala ai sa’u teugatupe fou?*

- Ofisa Autu a le UTOS Fogafale 3, Faletupe o Atinae a Samoa (DBS) i Apia.
- Fa’aaoga le M-Tala a le Vodafone Samoa e fa’atau ai au iunite mai lau telefoni feavea’i.
- Mo Savaii, asiasi i le lālā a le Pulega e Fa’atonutonuina Petipetiga po’o le GCA i Salelologa e tatala ai sau Teugatupe.
- Mo tagatanu’u Samoa o lo’o aumau i atunuu i fafo faamolemole imeli mai i le [info@utos.ws](mailto:info@utos.ws) mo le fa’atauina o iunite po’o le tatalaina o sau teugātupe i le UTOS.

5) *E mafai ona vaevae mai se Vaega o lau totogi e alu i totonu o lau UTOS pe teu sao mai lau teugatupe o loo teu i le faletupe?*

- Afai o oe o se tagata faigaluega a le Mālō Sāmoa, e mafai ona vaevae mai se vaega o lau totogi e ui mai le Matagaluega o Tupe e tului ai lou teugatupe i le UTOS; ae e manaomia le faatumu muamua o le tusi talosaga mo le “vaevaeina o le totogi”.
- A faapea e lē o oe se tagata faigaluega a le Mālō; e mafai ona vaevae mai lou teugatupe i le faletupe e tului ai lou teugatupe i le UTOS ae manaomia lou resitala

i lou faletupe mo lenei auaunaga.

- Mo Tagatanu’u Samoa o lo’o aumau i atunuu i fafo faamolemole imeli mai i le [info@utos.ws](mailto:info@utos.ws).
- E mafai ona fa’atau iunite e fa’aaogaina ai auaunaga a le M-Tala a le Vodafone Samoa e ala i lau telefoni feavea’i poo le resitala i luga le KlickEX (<https://www.klickexpacific.com>)e tului mai ai lou seleni.

6) *E faapefea ona ou iloa le tau e faatau mai ai ma le tau e talaina ai i tua iunite i soo se taimi?*

O le tau mo le iunite e tasi o le a faailoa atu i so’o se lālā o le Pulega e Fa’atonutonuina Petipetiga po’o le GCA i masina taitasi, po’o lou silasila i le matou upega tafailagi i le tuatusi [www.utos.ws](http://www.utos.ws), poo le matou Facebook Page “Unit Trust of Samoa”, pe asiasi i le Ofisa Autu o le UTOS. O le a imeli atu foi ia oe le tau mo le iunite pe a e talosaga mo faasalalauga i le imeli a le UTOS.

7) *E faafia ona fai tufatufaga ale UTOS?*

E fuafua lava le tufatufaga i aufaiiunite i le tala o tupe a le Faaputugatupe, ma e taumafai lava le Kamupani o Pulega e faataunuu se tufatufaga e tasi pe faa-lua foi i le tausaga. A faatino tufatufaga, o le a faasalalau i le Komiti o Faatonu ia luni i tausaga taitasi ae tufatufaina atu i le vaiaso lona lua o Iulai. E tolu masina e tuu atu i sui-faiiunite e fai ai se latou filifiliga pe tala i tua latou tufatufaga pe toe tului i totonu o latou teugatupe, a faapea ua maea le tolu masina e le’i faia se filifiliga a le sui faiiunite ona tuu sa’o laia le tufatufaga i totounu o le teugatupe.

## FAAMATALAGA TAU TUPE

### Pasene o le Aofaiga o Tupe Fa'asili

Tausaga	Tufatufaga	Si'itia o le Tau o le Iunite	Aofaiga
2011	0.00%	4.12%	4.12%
2012	0.00%	20.79%	20.79%
2013	4.90%	15.32%	20.22%
2014	5.88%	10.07%	15.95%
2015	6.29%	9.66%	15.95%
2016	5.70%	6.04%	11.74%
2017	5.70%	5.33%	11.03%
2018	6.33%	5.33%	11.66%
2019	6.06%	5.77%	11.83%
2020	5.49%	4.72%	10.21%
2021	5.68%	6.02%	11.70%
2022	4.52%	4.73%	9.25%

### Fa'amatalaga o Meatotino ma Aitalafu Fa'ai'uina 30 Iuni 2021


	2017	2018	2019	2020	2021
Tupe Faavae mai Iunite	66,115,847	69,101,191	98,300,433	126,213,088	129,365,598
Iunite ua totogi	43,850,295	47,360,861	65,191,548	81,670,883	82,619,857
Tupe Fa'asili Mama	2,691,398	56,561	95,158	174,143	4,507,756
Aofai o Meatotino	128,432,060	133,330,909	164,330,689	164,330,689	170,422,112
Aofai o Aitalafu	62,316,212	57,562,824	28,852,257	28,852,257	30,854,330
Aofai o tupe o teufaafaigaluega	123,224,822	131,083,011	159,905,344	159,905,344	169,315,737

### Fa'amatalaga o Tupe Maua ma Tupe Fa'aalu Fa'ai'uina 30 Iuni 2021



	2017	2018	2019	2020	2021
<b>Tupe Maua</b>	8,839,550	8,140,651	9,325,665	10,389,755	13,132,495
Tupe maua mai tufatufaga	1,263,537	788,341	38,370	2,780,834	856,113
Tului mai Nonogatupe	5,974,874	5,531,036	6,875,670	7,384,456	7,059,771
Isi Tupe Maua	1,601,139	1,678,878	2,361,559	34,474	5,765,298
<b>Tupe Fa'alu</b>	4,162,030	6,095,076	2,767,912	4,117,320	4,161,233
Totogi mo le Suetusi	20,125	23,000	23,000	23,000	23,000
Totogi o le faletupe	689	581	1,581	847	258
Totogi Tausi Mavaega	49,940	26,039	0	0	0
Totogi mo le Kamupani o Pulega	1,302,604	1,429,080	1,719,454	1,750,677	1,937,221
Tului o aitalafu	3,150,745	2,563,705	2,053,833	1,447,462	854,162
Tupe pā i le talaina o iunite	1,302,604	284,230	355,088	431,410	1,425,637
Isi Tupe Fa'aalu	18,287	16,324	17,718	33,537	38,891
<b>Isi Tupe Maua</b>	4,162,03	8,655,908	7,765,888	7,545,170	7,546,427


### Vaevaeina o teugatupe teufa'afaigaluega Fa'ai'uina 30 Iuni 2021



### Vaevaeaga o Tupe Faasili

Tausaga	Tupe Faasili I le Iunite (sene)	Aofaiga o Tufatufaga
2011	0	0
2012	0	0

2013	7	291,066
2014	17	2,654,833
2015	10	2,495,790
2016	9	3,559,582
2017	9	3,906,727
2018	10	4,680,412
2019	8	6,519,155
2020	8	6,193,450
2021	8	6,609,589



## FESOOTAIGA MA LE OFISA

E mafai ona e fesootai mai i se sui tau fefaatauaiga a le UTOS, i le numera o le telefoni +685 26949 poo le +685 29916, poo le imeli atu o fesili i le [info@utos.ws](mailto:info@utos.ws). Pe asiasi fo'i i le matou Facebook page "Unit Trust of Samoa".

E mafai foi ona e asiasi atu i le ofisa a le UTOS i lona nofoaga autu i le Fogafale 3 o le Faletupe o Atinae o Samoa, Apia.

Afai ua iai sou fa'aseā e faatatau i le Unit Trust of Samoa e mafai ona tuuina mai i le Ofisa Sili a le Kamupani o Pulega, le taitaifono o Komiti o Faatonu, poo le Tausi Mavaega.

E mafai ona e asiasi i le matou upega tafailagi [www.utos.ws](http://www.utos.ws) mo nisi faamatalaga.